

Jifunze Maandiko

Kwa kuwa yote yaliyotangulia kuandikwa yaliandikwa ili kutufundisha sisi; ili kwa saburi na faraja ya maandiko tupate kuwa na tumaini—**Warumi 15:4**.

Kitabu hiki Kitakatifu kimestahimili mashambulizi ya Shetani, ambaye aliungana na watu waovu ili kufanya kila kitu kibebacho tabia ya Mungu kufichwa kwa mawingu na giza. Lakini Bwana amekihifadhi Kitabu hiki Kitakatifu kwa uweza Wake mwenyewe wa kimiujiza katika mwonekano wake wa sasa—chatu au kitabu cha mwongozo kwa familia ya wanadamu ili kuwaonesha njia ya kwenda mbinguni... Neno hili ... ni kitabu cha mwongozo kwa wakazi wa ulimwengu ulioanguka, likiwausia kwamba kwa kusoma na kuyatii maagizo, hakuna roho hata moja ambayo ingepoteza njia yake.

Hakujawahi kuwa na wakati ambapo ilikuwa muhimu sana kwa wafuasi wa Yesu kusoma Biblia kama sasa. Mivuto idanganyayo iko kila upande na ni muhimu kwamba ushauriane na Yesu, rafiki yako aliye bora.... Daudi anatangaza, “Moyoni mwangu nimeliweka neno lako, Nisije nikakutenda dhambi.” Ni watu wangapi wamedanganywa hata kufanya dhambi, kwa sababu hawakutambua hali ya dhambi na kutafuta jinsi ambavyo wanaweza kuipinga kikamilifu kwa njia ya kujifunza Neno la Mungu kwa maombi. Majaribu yanapowajia, wanaonekana kutokuwa tayari na wasiojua hila za adui. Tunaishi katika nyakati za hatari na kadiri tunavyokaribia kufungwa kwa historia ya dunia, hakutakuwa na usalama kwa wale wasiolifahamu Neno la Mungu.... Kila kitu ambacho kinaweza kutikiswa, kitatikiswa.... Wana wa Mungu wamefikia sehemu hatari zaidi ya safari yao; kwa maana nyavu na mashimo ya adui yamewekwa kila upande. Lakini kwa uongozi wa Bwana, kwa yale yaliyofunuliwa waziwazi katika Neno Lake, tunaweza kutembea salama bila kujikwaa.... Sauti kutoka mbinguni inazungumza nasi katika kurasa zake.

Utii kwa Neno la Mungu ndio usalama wetu pekee dhidi ya maovu ambavyo yanausomba ulimwengu katika uharibifu.